



Aqqalu C. Jerimiassen

UPA 2022/43-1

Atassut

26. April 2022

**Inoqarfinnut isorliunerusuniittunut nunaqarfinnullu periarfissat pillugit inuttut ilanngaammut, nuna tamakkerlugu akileraarutip appasinneruneratigut, ilinniarnermilu taarsigassarsiniarnermi taarsersuinnermut iluaqusersuinerit il. il. nunatsinni atulersinnaanerit pillugu Norgemi Finnmarkimut atugassaritinneqartut isumassarsiorfigalugit Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut. Misissuinnermi periutsit taamaattut nunatsinni atuutsinneqalersinnaanerannut aningaasaqarnikkut allaffissornikkullu pisortanut, namminersortunut innuttaasunullu aningaasatigut malitsigisassaata ilaatinneqassapput. Misissuinnerup inernerit kingusinnerpaamik UPA2023-imi inatsisartunut agguanneqariissapput.**

(Inatsisartunut ilaasortaqaq Jess Svane, Siumut)

Pkt. 43

Inuiaavugut sineriammiunut agguqaasugut nunangaatsiarsuarmi, tamannalu iluaqutitaqartarlunilu nukittoqutitut inissisimajuartaraluarluni unammillernartorpassuarnittaaq malitseqartarpoq. Inoqarfiit annerit minnerillu sinerissami ineriartornikkut atungaasa naammagisimaarnartumik tamanut inissinniarnissaat unammillernartorpassuaqartaqaaq.

Tamannaliuna qanoq iliuuseqarfiginiaripput? Siunnersuuteqartup taakkartorpa Norgemi Finnmarkimi periuseq atorneqartoq, toqqammaviatigut soqutiginaateqarsinnaavoq marsilaassallugu.

Taamaattorli!

Nunatsinniuna innuttaasut akileraartartut kaasarfimmioqarnerulernissaat, akileraartarnermikkullu annerpaamik malunniuteqartumik akileraarutigisamik qanoq atorneqarnerannik pissarsiaqartarnissaat eqqanaagassatta annersarigaat.

Akissarsiat qaffakkiartortersaartuarneratigut nioqqutillu illuanittaaq akitsoriartortittuarneratigut tamanna angusinnaassagipput qularnarpoq.

Aningaasalliuna pisissutigineqarsinnaanera qaffassartuangassarigipput, inoqarfinni minnerniuppat annerniuppalluunniit.

Oqaannartarnermi “isorliunerusut artorsarput” tamatigut naammassorinarneq ajormat, ineriartorluartut unitsissanngilagut ineriartornikkut unammillernartorsiorfimmittut ineriartortinniarlugit. Ineriartorluartulliuku aningaasarsiornikkut pitsaasumik inissisimatittuarneratigut unammillernarnerusumik inissisimasuusut kivittussaagigut. Isorliunerusunimmi oqartuartailluta nunaqqaterput innuttaaqaterput tatiuartaarparput minnerusutut misigitinnissaanut qaninnerutilersarlugu.

Taakkuunnaangimmatami inuuniarnikkut artorsarnerusut, illuanimmi takusareerparputtaaq, inoqarfinni annerusuniittut inuppassuit isertitamikkut akunnattumik inissisimasuusut inuuniarnermikkut qanoq unammillernartorsiortiginerat. Taavami taakku? Sooruna assiliap illuinnaa tassani qiviartuartaaripput?

Aningaasap pisissutigineqarsinnaanera qaffassarsinnaaqaarput, akissarsiat qaffanneri nioqqutissallu akiisa eqqussukat piteqqaanngikkaluarlugit. Uani eqqarsaatigivarput, innutaasup akileraartartup kaasarfianut pisartut annertunerusariaarput, akileraartarnikkut aaqjissuussinissaq erseqqarinnerusariaqalerpoq. Ukiopassuarni akileraarutit sippuutaannik utertoortarnerit, akileraarutillu tapiutissaanik akilingassanittoortarnerit tamaasa unitsissinnaagaluaqaagut, ulluinnarni innutaasut akileraartartut suliffeqartuusut akileraarutaasa ataasiinnangorsarneqarneratigut.

Assigiinngitsorpassuit akitsuuteeqqat ilanngaatigineqarsinnaasullu allat ukiup akileraarfiusup naanerani kikkorpassuarnut allaffissornikkut suliaqutaasarnerat apparsarsinnaangaluaqigatsigu. Inummut ilanngaat uani qaffariartortinneqarnera pisariaarussinnaavoq, atorunnaarsitsinikkut nuna tamakkerlugu akileraarutip apparneqarneratigut (flat tax).

Taamaalilluni tassani kikkut tamarmik iluanaarnerusussaapput, akunnattumik isertitaqartuusut sorpassuartigut tapeqartitaanermikkut soqanngiusalluinnartumik inissisimasuusut, unammillernartumiittuarnerat millitissinnaagatsigu.

Nunarput tamaat sullitassaraarput, akileraartarnikkullu innutaasut akileraartartut ilaasa nammakkorsorneqarnerulernissaat Atassummiit taperseruminaatsillugu.

Aap, inoqarfinni unammillerfiunngitsuni nioqqutissat akisuneruneri tamatta nalugunanneqaarput, allalli ingerlalluartaq tigooqqaavigineqartariaqanngillat, namminnermi inuttut angusaqarusunnermikkut qaqsimasut nammattunngorsarniarneqartariaqanngimmata illuani aappai pissarsinerutinniarlugit. Oqaaseq sakkortusinnaangaluarpoq aatsaaginnaq atorneqartoq.

Taamaattorli erseqqissaqjinnassuarput, innuttaasut akileraartartuusut kaasarfimmioqarnerat pitsanngorsarusunnarneruvoq ilanngaatinik allanillu allaffissornikkut ilapittuutaasinnaasunik pilersitsinissaniik.

**Taamatut oqaaseqarluta Atassummiit siunnersuut itigartinneqassasoq innersuupparput.**